



## Inatsisartut

Aningaasaqarnermut Ataatsimiititaliaq  
Finansudvalget

Ulloq/Dato: 7. maj 2010  
J.nr.: 01.31.06/10-00476

### Aningaasaqarnermut Naalakkersuisoq

#### Aningaasaqarnermut Ataatsimiititaliap suliaq nr. 01.31.06/10-00476 pillugu sisamanngornermi ulloq 6. maj 2010-mi aalajangiinera pillugu Naalakkersuisunut ilisimatitsineq.

#### Arctic Umiaq Linemut aningaasaliissuteqaqqinnissaq pillugu qinnuteqaat

##### Naalakkersuisut inassutigaat,

- kontomi pingaarnermi 73.10.12 Arctic Umiaq Line, aningaasaliissutit 4.287.000 koruuninik amerlisinneqassasut
- kontomi pingaarnermi 20.11.50 Ingerlatsinerneqarnermut sillimmatit, aningaasaliissutit 4.287.000 koruuninik ikilisinneqassasut.

#### Aningaasaqarnermut Ataatsimiititaliap oqaaseqaatai

Arctic Umiaq Linep ingerlatsinerata 2010-mi august tikillugu ingerlatiinnarnissaanut aningaasat suliami matumani qinnutigineqarput. Siunertamut tamatumunnga 2010-mi aningaasanut inatsimmut 2,5 mio. kr.-it immikkoortinneqareerput, taakkuli naammangitsut paasinarsisimalluni. Taamaattumik aningaasaliissutit 4,3 mio. kr.-inik amerlineqarnissaat qinnutigineqarpoq, taamaalillunilu 2010 tapiissutit katillutik 6,8 mio. kr.-iussallutik. Qinnuteqaammi allassimavoq: ”*Taamaattumik Naalakkersuisut inassuteqaataat aningaasaqarnikkut pisariillisaanermik tunngaveqanngilaq, kisiannili naalakkersuinikkut kissaateqarnermik tunngaveqarluni*”. Taamaalillutik Angallannerneqarnermut Isumalioqatigiissitap sulinerminik naammassinninnissaata tungaanut ingerlatseqatigiiffiup amigartooruteqarfiusumik ingerlatsinera ingerlatiinnarneqassasoq, tamatumalu kingorna ingerlatseqatigiiffiup qanoq pineqarnissaa isummerfigineqassasoq Naalakkersuisut kissaatigaat.

Isummernissami tunngavissiaq tunngavigalugu ima apeqquteqarnissani ataatsimiititaliap kissaatigaa:

1. 2010-mi aningaasanut inatsimmi naatsorsuutigineqartumut sanilliullugu kontomi pingaarnermi 73.10.12-imi, Arctic Umiaq Linemut tunngasumi, aningaasaliissuteqarnissamik pisariaqartitsinerup taama annertuseriartigineranut tunuliaqutaasoq pillugu Naalakkersuisut qanoq paasissutissiissuteqarsinnaappat?
2. Unitsitsinissamut aningaasartuutitut takussutissiamit takuneqarsinnaavoq unitsitsinissamut aningaasartuutit junimit julimit 1 mio. kr.-it missaannik amerleriartut aammalu julimit augustimut 2,3 mio. kr.- amerleriartut. Aningaasat taakku qanoq naatsorsorneqarsimappat, tamannalu qaammagini taakkunanerpiaq ingerlatseqatigiiffiup aasaanerani takornarianit isertitaqarlunissaata naatsorsuutigisariaqarneranut qanoq naapertuuppa?
3. Isummernissamut tunngavissiami takussutissiaq 3-mi takutinneqarput 1999-imit 2006 ilanngullugu umiarsuarmik angallassinermi ilaasut ineriartorsimanerat. 2006-ip kingorna ineriartorneq pillugu Naalakkersuisut qanoq paasissutissiissuteqarsinnaappat

aammalu 2005-imit 2006-imut ilaasut ikileriarujussuarnerat angallannermi ataasiinnarmik aallaaveqalernermik taamaallaat pissuteqarsinnaava?

4. Ingerlatseqatigiiffiup amigartooruteqarsinnaaneranut 2009-mi aningaasanut inatsimmi qularnaveeqqutip 5 mio. kr.-inik aningaasartallip atorneqarnera pillugu Naalakkersuisut qanoq paasissutissiisinnaappat?

**Aningaasaqarnermut Ataatsimiititaliap aalajangiinera**

Naalakkersuisut inassuteqaataat Aningaasaqarnermut Ataatsimiititaliamit **akuersissutigineqarput**. Apeqqutinut siuliani allassimasunut Naalakkersuisut akissutaat aalajangiinerup matuma tiguneranit sapaatip akunneri pingasut qaangiutsinnagit kalaallisut danskisullu tiguneqarsimanissaa nuutinneratalu uunga nassiunneqarnissaa qinnutigineqarpoq: [nch@ina.gl](mailto:nch@ina.gl).

Aningaasaqarnermut Ataatsimiititaliaq sinnerlugu

Naaja Nathanielsen  
Aningaasaqarnermut Ataatsimiititaliap siulittaasua